

BERBUAT KEBAJIKAN KERANA ALLAH

(Dipetik dan dibaiki daripada “Syair Pintu Hantu”)

(Oleh Za‘ba)

1. Wahai saudara, akal yang mulia,
Berbuat kebajikan hendaklah selia,
Niatkan kerana Tuhan yang kaya,
Jangan bercampur ujub dan riyak.
2. Sebarang perbuatan kata segala,
Ikhlaskan kerana Allah Ta‘ālā,
Ujub dan riyak jangan dimula,
Supaya jangan batin tercela.
3. Perasaan ujub jika dituruti,
Atau pun riyak merajai hati,
Hilang kebajikan percuma nanti,
Tidak diakui *Rabbul ‘Izzat*.
4. Terkadang orang bersuka-suka,
Ujub dan riyak datang membika,
Tiada sedarkan aib terbuka,
Sehingga jadi menghitamkan muka.
5. Terkadang merasa dirinya pandai,
Hendak ditunjukkan sahabat handai,
Hingga berhutang atau bergadai,
Orang menunggu datang berdedai.
6. Itulah Gunan laku sempurna,
Megah terpuji ke sini sana!
Tidak disedar batinnya hina,
Tulus dan ikhlas entah di mana!
7. Terkadang merasa dirinya kacak,
Wang di saku dikocak-kocak,
Ke sana sini gaya melincak,
Laku seperti lipas dan cicak.
8. Setengahnya pula kaum puteri,
Ujubkan rupanya cantik berseri,
Bibir bergincu kuntum penyeri,
Gerak seperti joget menari.

9. Menghisap rokok jari terjangkit,
 Menghembuskan asap seperti bukit,
 Berjalan melengkok hanyutan rakit,
 Nampaklah candang cangak membangkit!
10. Meliyuk lampai jika berperi,
 Rokok tak lekang daripada jari,
 Jika tiada wang sendiri,
 Kepada lelaki meminta beri!
11. Terkadang terasa di dalam hati,
 “Akulah alim lepok mengerti;
 Segala ilmu habis ku tuntut!
 Sekalian bahasa muda ku dapati!”
12. Semuanya ini terjadi maka,
 Kerana ujub riyak belaka,
 Hingga membawa sifat derhaka,
 Atau mensyirikkan Tuhan yang baka’!
13. Sebaik-baik jalan bahagia,
 Tutupkan pintu ujub dan riyak,
- Jangan disombongkan kelebihan sedia,
 Ingatkan kurnia Tuhan yang kaya.
14. Sombong takbur jangan hampiri,
 Ujub dan riyak sama selari,
 Ketiganya penyakit di batin sanubari,
Husnul Khātimah hapus tercuri.
15. Siapa bersifat ujub dan takbur,
 Kemuliaan habis luruh berhimbur,
 Hancur luluh remuk dan lebur,
 Ke dalam kehinaan jatuh tercebur.
16. Berbuat kebajikan jagalah tuan,
 Hendaklah khalis kerana Tuhan;
 Syukur kepada-Nya apa-apa kelebihan,
 Supaya baik nilai kesudahan.
17. Salangkan Abū Yazīd Bustāmī,
 Sufyān al-Thūrī *ahlu al-‘ilmī*,
 Keduannya masyhur arif di bumi,
 Keduanya takutkan *su ’al-khitami*.